

Gou Dwg Bouxmaezsaw Iq

Daihgya ndei! Gou heuh Vangz Veiyij, gou dwg boux maezsawq iq ndeu. Ngoenzneix gou caeuq daihgya faenyienj haenx dwg gij goj maezsaw gou.

Daj mwh gou hainduj yi yi yaya hag gangj vah, daxmeh ngoenzngoenz cungj youq gou mwh ninz gaxgonq gangj gojgaeq hawj gou dingq: 《Mienhbau Dujfwj Saenzgeiz》、《Mouiq Beigiz Lingzsingj》、《Gofaex Simgyaez Mbouj Gouz Hoizbauq》…… Gij gojgaeq neix couh lumj gaiqfaex fapswd saenzgeiz, dazyinx gou haeuj ndaw seiqgyaiq saw bae, buenx gou haeujninz.

Hwnj youwzyenz le, daxmeh ngoenzngoenz ciep gou ma ranz, de bae ranzdajcawj cawj haeux, gou couh youq henz guhcaemz. Hoeng cij yaep ndeu, daxmeh couh mbouj dingqny sing guhcaemz gou lo. “Veiyij, Veiyij!” Daxmeh deng hwk dwk dauqcawq ra gou. Gou ne, gizsaed couh naengh youq gwnz sahfaez, roxnaeuz gwnz mbonq, youh roxnaeuz ing youq henz gvihsaw, dinghdingh yawj saw ne! Caih daxmeh baenzlawz heuh, gou couh lumj mbouj ndaejny nei. Moix baez daxmeh ra raen gou, cungj dwg youh hozndat youh ndeiri. Dwg ha, gou hix mbouj miz banhfap, gou couhwdw boux maezsaw iq ndeu, gou couhwdw maij doegsaw. Cijaeu maez haeuj saw bae, cawzle byajraez, gij sing wng gou cungj dingq mbouj nyi.

Mizmbangj doengzhag aiq yienghneix naeuz: “Raeuz lwngyez youh mbouj rox geij cih saw, doeg ndaej geijlai saw ne? Mwnz cejdaihbaup ba?” Gou cij mbouj cejdaihbaup ne! Daihgya dingq gangj gvaq bonj sawveh ba, couhwdw saw veh okdaeuj haenx, daj iq daengz hung, gou doeg le song bak lai bonj sawveh. Mwh iq, dwg daxmeh gangj, gou dingq gou yawj; doeklaeng ha, dwg gou doeg, daxmeh dingq; seizneix ne, gou doeg it nienzgaep lo, gou ndaej angqyouz youq ndaw haijsaw lo, lauxsae lij hawj gou vih gyoengq doengzhag doeg doegsaw cangyisuh hagdanz fat haenx ne!

Gou cei qyaez dangz doegsaw ngoenz singgeiz ngeih, aenvih gou ndaej swyouz doeg saw engq mizyinx de. Gou cingqcaih doeg 《Dinhung Diuq Bahleiz》《Bijdwz · Banh》《Sanhgoz Yenji》《Lizsij Seiqgyaiq》…… Gou gig gyaiez dahsau dinhung, aenvih de itcig daihdamj genhciz guh gij saeh de gyaiez haenx; gou hozhaenz Bijdwz · Banh, aenvih de rox mbin, mbin ndaej gig sang……

Gou hix dwg dahni qyaez guhcaemz gyaiez liuh, mwh mbouj miz saw doeg, couh lumj boux lwngyez manz nei dauqcawq liuh caeuq guhcaemz. Hoeng mboujlwnh liuh caeuq guhcaemz ndaej geij lai guengz, cijaeu miz saw, gou couh sikhaek bienqbaenz dahni caemdingh ndeu, dinghdingh



doeg saw. Saw, mboujdan hawj gou baenz boux hagseng maenhndei, engq hawj gou yawjraen seiqgyaiq gvangqlangh. Gak boux doengzhag, danghnaeuz sou miz saw ndei, gou nyienh caeuq sou vuenh daeuj doeg, hawj saw baenz baengzyoux ndei doxcae dou ba.

Gou dwg maezsaw iq Vangz Veiyij, muengh daihgya gyaiez gou, gyo 'mbaiq daihgya!

(it nienzgaep Vangz Veiyij)



Dawz Ciengqyouz Cuengq Haeuj Lwngj-dungsiz Ndaw Binghsiengh Bae Le

Miz ngoenz ndeu, mbwn hwnq lai, gou doiq daxmeh daezok bae cawx sietgau daeuj gwn. Daxmeh naeuz swnhbienh cawx bingz ciengqyouz ndeu ma.

Gou cie qyaez cienz, sikhaek buet bae coh bouqgaihuq genj sietgau gou maij haenx. Genj sat le, gou mbouj lumz cawx bingz ciengqyouz he caij ma ranz. Cawx sat le, gou riuj doxgaiq riengrit buet ma ranz. Daengz ranz le, gou caj mbouj gib daw diuz sietgau he daeuj gwn. Yienzhaeuh gou siengj cungj mbouj siengj, couh dawz sietgau lw roengz haenx caeuq bingz ciengqyouz doxcae cuengq haeuj lwngjdungsiz ndaw binghsiengh bae.

Ngoenz daihneih banngaiz, gou cingq haeujmaez yawj densi. Daxmeh itmienh cau byaek, itmienh cam gou ciengqyouz youq gizlawz.

Seizde, gou cij siengj hwnj ciengqyouz lij youq ndaw binghsiengh. Gou hai binghsiengh, guh ndei cunjbei deng ndaq. Hoeng, gou doeksaet dangqmaz, ciengqyouz gingqyenz mbouj deng giet baenz nae! Neix dwg vih gijmaz ne? Gou dawz ciengqyouz ndenq hawj daxmeh, cam daxmeh ciengqyouz vihmaz mbouj deng giet nae. Daxmeh naeuz de hix mbouj rox. Yienghneix, gou ra saw caz swliu. Gwnz saw naeuz, ciengqyouz diemj gietnae youq -40°C baedauq. Doh-raeuj lwngjdungsiz binghsiengh ranz gou cij miz -18°C baedauq. Ndigah, dawz ciengqyouz cuengq youq lwngjdungsiz ndaw binghsiengh, dangyenz mbouj deng giet baenz nae lo!

Laxlawz dwg yienghneix.

(sei qnienzgaep Ciz Yenzyui)

Ronghrib

Guhlawz mbouj mbin daengz gyangmbwn sangsang bae ne? Ronghrib gwnzgnz lajlaj cungj mbinfengfeng.

Mbin bae gyangmbwn sangsang de bae ne, mwnz couh baenz aenndaundeiq ronghmyabmyab lo.

Vihmaz cungj gyaiez mbin daemqdetdet ne?

Youq henz naz, daemqdetdet mbin bae mbin dauq, ronghmyabmyab. Rongh garoen hawj bouxguhnaz gyanghaemh bae doengh-naz yawj raemx naz, dwg lwi?

Youq diegdanz gyoengqdou langhliengz de, daemqdetdet mbin bae mbin dauq, youq henz ndang gyoengqdou mbin bae mbin dauq, ronghmyabmyab. Yaek caeuq gyoengqdou guhdaih guhcaemz, hawj lwngyez dou ngoenzngoenz gyanghaemh cungj angqvauvau, dwg lwi?

Youq byoznywj henz suen, daemqdetdet mbin bae mbin dauq, youq ndaw ndoengfaexndoeck henz dah mbin bae mbin dauq, ronghmyabmyab. Gyaiez youq ndaw byoznywj, ndaw ndoengfaexndoeck caeuq duznong duznongz caemh fwen caemh angq, dwg lwi? Gyangmbwn sangsang de, mbouj miz duznong duznongz caemh fwen caemh angq, nyaenx cix mbwqmyatmyat bw.

Youq gwnz ndoibya, daemqdetdet mbin bae mbin dauq, youq ndaw doenghnaz mbin bae mbin dauq, ronghmyabmyab. Hawj gyanghaemh bya ndoi raeuz lai gyaunde, dwg lwi? Hawj doenghgi ndaundeiq gwnzmbwn yawjraen, bya ndoi

raeuz goj miz haujlai ndau-ndeiq ronghsagsag lumj gyoengqde nei, geq cungj geq mbouj liux.

Ronghrib ronghmyabmyab, dwg gij ndaundeiq rox mbin rox diuqfoux ndaw bya ndoi raeuz.

(Daj 《Bonjsei Sim Lwngyez》
(Veiz Gizlinz raiz)
senj okdaeuj, Lwg-fwngzme/卢 奋 长 hoiz)

